



Progetu finantziau cun su dinai de sa Regione Autònoma de Sardinia cunformas a sa L. 482/99 e a sa L.R. 22/2018

## Su contu de Monti de Lora

Una diri unu pastori fiat apitzus de su monti de Lora, fiat callendu su casu, ecu ca totinduna s'acostat unu beciteddu ca ddi narat:

- Fai-mì sa caridadi, dona-mì unu pagheddu de callau ca seu mortu de fàmini;

Ma su pastori nci-dd'at curtu de mala manera. Intzandus su beciteddu, ca fiat Gesus Cristu, si-nc'est andau in su cùcuru de su monti de Lora e totinduna s'intendit unu pilloni ca cantat diaici:

- Trocidì de innoi, trocidì de innoi, trocidì de innoi;

Su pastorri arrannegau bessit aforas de sa pinneta e incumentzat a tzèrrius:

- Chi non ti-ndi andas de innoi ti-dd'onu deus su "trocidì de innoi", cun sa scupeta!

Ma non iat incora acabau de nai cussa cosa ca nci-ddu fiat arrutu su monti apitzus, de issu e de totu su bestiàmini e iat bociu a issu paris cun is animalis.

Sa pobidda de su pastori currit anca fiat sutzèdia sa disgràzia a su pobiddu e incumentzat a tzerriai prangendi:

"Sa corona de su monti de lora  
T'abetu e no incora  
Sa coraona de Palasteni  
T'abetu e non benis"

Ma nemus dd'iat arraspusta e sa faci sua disisperada est abarrada figurada me in sa perda de monti de Lora.

**Beppe Sirigo e is Morus**

Custu fiat Beppe Sirigo de Biddeputzi, fiat unu grand'òmini e coragiosu meda, teniat una boxi grussa, teniat porcus e su cuili acanta de su mari. Una diri me in "s'acqua de s'ùlimu" fiat sbarcaus una pariga de morus po furai in calincunu cuili.

Perou candu fiat sbarchendu si-ndi fiat acataus is serbidoris de Beppe Sirigo e fiat andaus currendi acanta de su meri e dd'ant conta su chi iant biu.

E intzandus Beppe Sirigo nci ghetat una boxi e narat:

- Non timais ca nc'est Beppe Sirigo;

Custa boxi s'est intèndia siat me is montis de acanta siat me is montis de atesu. Intzandus is morus timendi chi cussa boxi grai fessit de un'òmini mannu meda, iant timiu e si-ndi fiat andaus pioti-pioti. Perou ndi funt abarraus ddus, is prus coragiosus e Beppe Sirigo ddus at scurtus cun unu fusti e nci-ddus at ghetaus in unu fossu.